

摘藻堂四庫全書薈要

史部

欽定四庫全書薈要卷九千七百二十五

史部

直齋書錄解題卷十九

宋 陳振孫 撰

詩集類上

凡無他文而獨有詩及雖有他文而詩集復獨行者別為一類

阮步兵集四卷

魏步兵校尉陳留阮籍嗣宗撰其題皆曰詠懷首卷四言十三篇餘皆五言八十篇通為九十三篇文選

所收十七篇而已

宋武帝集一卷

孝武駿也

梁簡文帝集五卷

簡文帝綱也按隋志八十五卷唐已缺五卷中興書  
目止存一卷詩百篇又缺其三首今五卷皆詩總二  
百四十四篇

梁元帝詩一卷

即湘東王繹

謝惠連集一卷

宋司徒參軍謝惠連撰本集五卷今惟詩二十四首  
惠連得名早輕薄多尤累故仕不顯死時財三十七  
歲

劉孝綽集一卷

梁秘書監彭城劉孝綽撰宋僕射勔之孫本傳稱文  
集數十萬言今所存止此又言兄弟及羣從子姪當

時有七十人並能屬文近古未有其三妹亦並有才學適徐悱者文尤清拔所謂劉三娘者也今玉臺集中有悱妻詩

柳吳興集一卷

梁吳興太守河東柳惔文暢撰僅有十八首

徐孝穆集一卷

陳太子太傅東海徐陵孝穆撰本傳稱其文喪亂散失存者二十卷今惟詩五十餘篇

江總集一卷

陳尚書令考城江總總持撰總在陳為太子詹事以宮禁為長夜之飲及後主即位當權任日為艷詩君臣昏亂以至亡國入隋為上開府唐志集三十卷中興書目七卷今惟存詩近百首云

陰鏗集一卷

陳散騎常侍南平陰鏗子堅撰財三十餘篇杜子美云李侯有佳句徃徃似陰鏗今考之未見鏗之所以

似太白者太白固未易似也子美云爾殆必有說

薛道衡集一卷

隋內史侍郎河東薛道衡元卿撰詩凡十九篇本集三十卷所存止此大抵隋以前文集存全者亡幾多好事者於類書中鈔出以備家數也

杜必簡集一卷

唐著作郎襄陽杜審言必簡撰工部之祖也唐初沈宋以來律詩始盛行然未以平側失眼為忌審言詩

雖不多句律極嚴無一失粘者甫之家傳有自來矣  
然遂欲衙官屈宋則不可也

薛少保集一卷

唐太子少保河東薛稷嗣通撰稷道衡曾孫魏徵外  
孫

喬知之集一卷

唐右司郎喬知之撰天授中為酷吏所陷死集中有  
綠珠怨蓋其所由以致禍也



孟襄陽集三卷

唐進士孟浩然撰宜城王士源序之凡二百十八首  
分為七類太常卿韋縯為之重序

崔顥集一卷

唐司勳員外郎崔顥撰開元十年進士才俊無行黃  
鶴樓詩盛傳於世

祖詠集一卷

唐祖詠撰開元十二年進士

崔國輔集一卷

唐集賢直學士禮部員外郎崔國輔撰開元十三年  
進士應縣令舉為許昌令天寶中加學士後以王鉉  
近親坐貶詩凡二十八首臨海李氏本後又得石林  
葉氏本多六首

綦母潛集一卷

唐待制集賢院南康綦母潛孝通撰南康今贛州  
儲光羲集五卷

唐監察御史魯國諸光義撰與崔國輔綦毋潛皆同年進士天寶末任偽官貶死顧況為集序

常建集一卷

唐盱眙尉常建撰

王江寧集一卷

唐龍標尉江寧王昌齡少伯撰與常建俱開元十四年進士二十二年選宏辭超絕羣類為汜水尉不護細行貶龍標世亂還里為刺史閻丘曉所殺為詩緒

密而思清

李頎集一卷

唐李頎撰開元二十三年進士

崔曙集一卷

唐崔曙撰開元二十六年進士狀頭

杜工部詩集注三十六卷

蜀人郭知達所集九家注世有稱東坡杜詩故事者  
隨事造文一一牽合而皆不言其所自出且其辭氣

首末若出一口蓋妄人依托以欺亂流俗者書坊輒  
勦入集注中殊敗人意此本獨削去之福清曾噩子  
肅刻板五羊漕司最為善本

門類杜詩二十五卷

稱東萊徐宅居仁編次未詳何人

類集詩史三十卷

莆陽方醇道溫叟編

王季友集一卷

唐王季友撰元結篋中集有季友詩二首今此集有  
七篇而篋中二首不在焉杜詩所謂酆城客子王季  
友者意即其人耶

陶翰集一卷

唐禮部員外郎丹陽陶翰撰開元十八年進士次年  
鴻詞

秦隱君集一卷

唐處士秦系公緒撰系自天寶間有詩名藩鎮奏辟

皆不就嘗隱越之剡泉之南安至貞元中年八十餘  
不知所終此本南安所刻余又嘗於宋次道寶刻叢  
章得其逸詩二首書冊末

岑嘉州集八卷

唐嘉州刺史南陽岑參撰文本之曾孫

案唐書岑參乃岑文本之

曾孫原本脫文  
本二字今補正

天寶三載進士為補闕左史郎官與

杜甫唱和

李嘉祐集一卷

唐台州刺史李嘉祐從一撰天寶七載進士亦號臺閣集李肇稱其水田飛白鷺夏木嘯黃鸝之句王維取之以為七言今按此集無之

皇甫冉集一卷

案唐書藝文志作三卷

唐左補闕丹陽皇甫冉茂政撰與其弟曾齊名集有獨孤及序

皇甫曾集一卷

唐侍御史皇甫曾孝常撰天寶十二載進士兄冉後



曾三載登第

郎士元集一卷

唐郢州刺史中山郎士元君胄撰天寶十五載進士

寶應中選畿縣官肅宗詔試中書補渭南尉歷拾遺

刺史

案唐書士元於寶應元年選畿縣官詔試中書補渭南尉歷拾遺郢州刺史原本脫誤今改正

包何集一卷

唐起居舍人延陵包何幼嗣撰

案唐書包何字幼嗣原本作幼正今改正

何融之子與弟佶齊白

包佶集一卷

唐秘書監包佶撰天寶六載進士兄何後一年

錢考功集十卷

唐考功員外郎吳興錢起撰天寶十載進士世所傳  
湘靈鼓瑟詩斷句用鬼語者即其試作也蜀本作前  
後集十三卷

韓翃集五卷

唐中書舍人韓翃君平撰天寶十三載進士以春城

飛花之句受知德宗

顧況集五卷

唐著作郎吳郡顧況逋翁撰至德二載進士皇甫湜作序湜嘗言吾自為顧況作序未嘗許他人況在唐蓋為人推重也集本十五卷

案唐書藝文志作二十卷

今止五卷

不全

嚴維集一卷

唐秘書郎山陰嚴維正文撰至德二載辭藻宏麗科

韋蘇州集十卷

唐韋應物京兆人天寶時為三衛後作洛陽丞京兆府功曹知滁州二州召還或媚其進媒孽之計出為蘇州刺史詩律自沈宋以後日益靡嫚鏤章刻句揣摩浮切雖音韻諧婉屬對麗密而閑雅平淡之氣不存矣獨應物之詩馳驟建安以還得其風格云

耿漳集二卷

唐右拾遺河東耿漳撰寶應二年進士登科記一作

緯

司空文明集二卷

唐虞部郎中京兆司空曙文明撰別本一卷財數篇

李端集三卷

唐杭州司馬趙郡李端撰大厯五年進士

盧綸集十卷

唐戶部郎中河東盧綸允言撰綸與吉中孚錢起韓  
翃司空曙苗發崔峒耿漳夏侯審李端皆有詩名號

大歷十才子

李益集二卷

唐集賢學士右散騎常侍李益君虞撰益宰相揆之族子大歷四年進士歌詩與宗人賀齊名舊史本傳稱其少有癡病防閑妻妾過於苛酷有散灰扃戶之說聞於時故時謂妬癡為李益疾按世傳霍小玉傳所謂李十郎詩開簾風動竹疑是故人來者即益也舊史所載如此豈小玉將死訣絕之言果驗耶抑好

事者因其有此疾遂為此說以實之也

孟東野集一卷

唐溧陽尉孟郊東野撰

朱放集一卷

唐右拾遺吳郡朱放長通撰按藝文志云襄州人隱居剡谿貞元初召為拾遺不就

朱灣集一卷

紫唐書藝文志作四卷

唐永平從事朱灣撰自號滄州其為從事李勉辟之

也

麴信陵集一卷

唐望江令麴信陵撰貞元元年進士

長孫佐輔集一卷

唐長孫佐輔撰按百家詩選云德宗時人其弟公輔  
為吉州刺史往依焉當必有所據也其詩號古調集  
柳宗元詩一卷

唐柳宗元撰子厚詩在唐與王摩詰韋應物相上下



頗有陶謝風氣古律絕句總一百四十五篇在金集  
中不便於觀覽因鈔出別行

張籍集三卷

案唐書藝文志作七卷

唐國子司業張籍文昌撰川本作五卷

木鐸集十二卷

張洎所編錢公輔名木鐸集與他本相出入亦有他  
本所無者

張司業集八卷附錄一卷

湯中季庸以諸本校定且考訂其為吳郡人魏峻叔  
高刻之平江續又得木鐸集凡他本所無者皆附其  
末

王建集十卷

唐陝州司馬王建仲和撰建長於樂府與張籍相上  
下大歷十年進士也歷官昭應縣丞太和中為陝州  
司馬尤長宮詞

王建宮詞一卷

即集中第十卷錄出別行

李長吉集一卷

案唐書藝文志作五卷文獻通攷亦云集四卷外集一卷

唐奉禮郎李賀長吉撰賀不壽仕不顯而世多喜言其人此不復叙

盧仝集三卷

唐處士洛陽盧仝撰自號玉川子其詩古怪而女兒集小婦吟所有思諸篇輒嫵媚豔冶其第三卷號集外詩凡十首慶歷中有韓愈者為之序川本止前二

卷

劉義集二卷

唐處士劉義撰

案唐書附見韓愈傳者乃劉義也作水柱雪車二詩出盧仝孟郊右有集

二卷原本作劉義今改正

附見新史韓愈傳不知何處人但云歸

齊魯不知所終而已其水柱雪車二詩狂怪誠出盧

仝右然豈風人之謂哉

楊少尹集五卷

案唐書藝文志文獻通攷俱作一卷

唐河南少尹楊巨源景山撰按韓退之有送楊少尹

序蓋自司業為少尹稱其都少尹者乃其鄉里也藝

文志乃云太和河中少尹誤

案唐詩紀事楊巨源蒲州人為國子司業時年

滿七十丐歸時宰惜其去署以為其都少尹不絕其祿張籍有送揚少尹赴河中詩云官為本府當身榮因得還鄉任野情則為河中少尹無疑陳氏稱河南少尹反以河中為誤非也又攷韓愈送揚少尹序乃在長慶中唐詩紀事稱為大中時固非唐志稱為太和中亦疑誤也第三卷末二十餘

篇有目無詩

武元衡集一卷

唐宰相武元衡伯蒼撰初用莆田李氏本傳錄後以

石林葉氏本校益以六首及李吉甫唱酬六首川本作二卷

張碧歌詩集一卷

案唐書藝文志作張碧歌行集二卷

唐張碧太碧撰藝文志云貞元時人集中有覽貫休上人詩或勦入之也

陳羽集一卷

唐東宮衛佐陳羽撰貞元八年陸贄下第二人

羊士諤集一卷

唐侍御史羊士諤撰貞元元年進士竇羣引為御史  
共傾李吉甫者也

鮑溶集五卷

唐鮑溶撰元和四年進士

竇拾遺集一卷

唐左拾遺扶風竇叔向撰包何為序

案竇叔向集包何為之序原本

作包行誤  
今改正

羣常牟庠鞏皆其子也

賈長江集十卷

唐長江尉范陽賈島閬仙撰韓退之有送無本詩即  
其人也後返初服舉進士不第文宗時作飛謗貶長  
江會昌初以普州參軍卒

案唐書賈島會昌初以普  
州司倉參軍遷司戶未受

命卒原本作  
普州今改正

本傳所載如此今遂寧刊本首載大中

墨制云比者禮部奏卿風狂且養疾關外今却攜卷  
軸潛至京城遇朕微行聞卿諷詠觀其志業可謂屈  
人是用顯我特恩賜卿墨制宜從短簿別候殊科與  
傳所稱誹謗不同蓋宣宗好微行小說載島應對忤



旨好事者撰此制以實之安有微行而顯著訓詞者  
首稱奏卿風狂尤為可笑當以本傳為正本傳亦據  
墓志也唐貴進士科故誌言貴授長江如溫飛卿亦  
謫方城尉當時為鄉貢進士不博上州刺史則簿尉  
固宜謂之責授若使今世進士得罪而責授簿尉則  
惟恐責之不早耳

姚少監集十卷

唐秘書少監姚合撰崇之曾孫也元和十一年進士

嘗為杭州刺史開成末終秘書監川本卷數同編次  
異

莊南傑集一卷

唐進士莊南傑撰與賈島同時

李涉集一卷

唐國子太學博士李涉撰渤之弟也

殷堯藩集一卷

唐侍御史殷堯藩撰元和元年進士

案唐書作元和九年進士

章孝標集一卷

唐秘書省正字章孝標撰元和十四年進士

熊儒登集一卷

唐西川從事熊儒登撰元和中人執易其從姪也

西山集一卷

宋唐書藝文志作十卷

唐施肩吾撰元和十五年進士

雍裕之集一卷

唐雍裕之撰未詳何時人

張南史集一卷

唐試參軍范陽張南史季直撰

王涯集一卷

唐宰相王涯廣津撰

袁不約集一卷

唐袁不約還朴撰長慶三年進士其年試麗龜賦

追昔遊編三卷

唐宰相李紳公垂撰皆平生歷官及遷謫所至述懷

紀遊之作也余嘗書其後云讀此編見其飾智矜能  
誇榮殉勢益知子陵元亮為千古高人

朱景元集一卷

唐太子諭德朱景元撰

朱慶餘集一卷

唐朱可久慶餘撰以字行受知於張籍寶曆二年進  
士

李義山集三卷

唐太學博士李商隱義山撰

溫飛卿集七卷

唐方城尉溫庭筠飛卿撰

張祜集十卷

案唐書藝文志作一卷

唐處士張祜承吉撰

丁卯集二卷

唐郢州刺史丹陽許渾用晦撰太和五年進士

案晁公武

讀書志作太和六年進士

丁卯者其所居之地有丁卯橋蜀本又

有拾遺二卷

李遠集一卷

唐建州刺史李遠求古撰

于鵠集一卷

唐于鵠撰與張籍同時未詳其人

薛瑩集一卷

唐薛瑩撰號洞庭集文宗時人集中多蜀詩其曰壬寅歲者在前則為長慶四年後則為中和二年未知

定何年也

薛逢集一卷

案唐書藝文志作十卷

唐秘書監薛逢陶臣撰會昌元年進士

喻鳧集一卷

唐烏程尉喻鳧撰開成五年進士

潘咸集一卷

唐潘咸撰不知何人與喻鳧同時藝文志不載

項斯集一卷



唐丹徒尉江東項斯子遷撰初受知於張籍水部而  
楊敬之祭酒亦知之有逢人說項斯之句會昌四年  
進士

渭南集一卷

案唐書藝文  
志作三卷

唐渭南尉趙嘏承祐撰壓卷有長笛一聲人倚樓之  
句當時稱為趙倚樓

馬戴集一卷

唐馬戴虞臣撰以上二人皆會昌五年進士

薛許昌集十卷

唐許昌節度使薛能撰會昌六年進士

李羣玉集三卷

唐宏文校書澧陽李羣玉文山撰裴休以處士薦集  
後有乞假歸別業及朝士送行詩

曹鄴集一卷

唐洋州刺史曹鄴撰大中四年進士

津陽門詩一卷

唐鄭嵎撰大中五年進士或作愚者非也愚嘗為嶺南節度好著錦半臂者非此鄭嵎也津陽者華清宮門名

劉駕集一卷

唐劉駕司南撰大中六年進士

李頻集一卷

唐建州刺史新定李頻德新撰大中八年進士姚合之壻也

李端公集一卷

唐侍御史李郢楚望撰大中十年進士

儲嗣宗集一卷

唐儲嗣宗撰大中十三年進士

案儲嗣宗大中十三年進士原本作十年

係脫誤  
今改正

司馬先輩集一卷

唐司馬札撰與儲嗣宗同時

李廓集一卷

唐武寧節度李廓撰程之子也

案唐書李程子名廓原本作廓誤今改正

于漬集一卷

唐于漬子漪撰

案唐書藝文志作于漬集一卷漬字于漪原本作于漬誤今改正

咸

通二年進士

李昌符集一卷

唐膳部員外郎李昌符撰咸通四年進士

司空表聖集十卷

唐兵部侍郎司空圖表聖撰咸通十年進士別有全

集此集皆詩也其子永州刺史荷為後記

聶夷中集一卷

唐華陰尉聶夷中撰咸通十二年進士

許棠集一卷

唐宛陵許棠文化撰亦咸通十二年進士

林寬集一卷

唐林寬撰與李頻許棠皆同時集有送二人詩

周繇集一卷

唐周繇撰咸通十三年進士

無譏集四卷

唐崔櫓撰僖宗時人

章碣集一卷

唐章碣撰亦僖宗時人

高蟾集一卷

唐御史中丞高蟾撰乾符三年進士

崔塗集一卷

唐崔塗禮山撰光啓四年進士

雲臺編三卷

唐都官郎中宜春鄭谷守愚撰光啓三年進士

香奩集二卷入內廷後詩集一卷別集三卷

唐翰林學士韓偓致光撰

唐英集三卷

唐翰林學士吳融子華撰融與偓皆龍紀元年進士

張蠙集一卷



唐張蠉象文撰乾寧二年進士

靈溪集七卷

唐校書郎上饒王貞白有道撰乾寧二年進士其集有自序永豐人有藏之者洪景廬得而刻之詩雖多在一時儕輩未為工也

翁承贊集一卷

唐諫議大夫京兆翁承贊文堯撰乾符二年進士

褚載集一卷

案唐書藝文志作三卷

唐褚載厚之撰

王穀集一卷

唐王穀虛中撰二人皆乾寧五年進士

浣花集一卷

蜀韋莊撰唐乾寧元年進士也

王駕集一卷

案唐書藝文志作六卷

唐彭城王駕大用撰大順元年進士自號守素先生

喻坦之集一卷

唐喻坦之撰

張喬集二卷

唐進士九華張喬撰喬與許棠張蠩鄭谷喻坦之等同時號十哲喬試京兆月中桂詩擅場傳於今而登科記無名蓋不中第也

高駢集一卷

唐淮南節度使高駢撰

周賀集一卷

唐周賀撰嘗為僧名清塞後反初服別本又號清塞集

李洞集一卷

唐李洞撰與張喬同時稱餘杭明經潘熙載編

曹唐集一卷

唐桂林曹唐堯賓撰有大小游仙詩

來鵬集一卷

唐豫章來鵬撰咸通中舉進士不第

任藩集一卷

唐任藩撰或作翻客居天台有宿恰幘山絕句為人

所稱今城中巾子山也

元英集十卷

唐處士新定方干撰

唐風集三卷

案晁公武讀書志作十卷

唐九華山杜荀鶴撰

詠史詩三卷

唐邵陽胡曾撰凡一百五十首曾咸通末為漢南從事

羅江東集十卷

唐羅隱昭諫撰

劉滄集一卷

唐進士劉滄蘊靈撰

羅鄴集一卷

唐羅鄴撰

曹松集一卷

案唐書藝文志作三卷

唐曹松夢徵撰天復元年進士別本與印本互有詳畧但別本大遊仙十三首乃曹唐詩也

比紅兒詩一卷

唐鄜州從事羅虬撰紅兒者雕陰官妓杜也

唐彥謙集一卷

案唐書藝文志作三卷

唐河中節度副使襄陽唐彥謙茂業撰號鹿門先生

秦韜玉集一卷

唐秦韜玉撰

東浮集九卷

唐荆南崔道融撰自稱東甌散人乾寧乙卯永嘉山齋編成蓋避地於此今缺第十卷

唐詩三卷

崔道融撰皆四言詩述唐中世以前事實事為一篇篇各有小序凡六十九篇

裴說集一卷



唐裴說撰天祐三年進士狀頭唐蓋將亡矣說後為禮部員外郎世傳其寄邊衣古詩甚麗此集無之僅有短律而已非全集也其詩有避亂一身多之句

劉得仁集一卷

唐進士劉得仁撰公主之子累舉不第而卒

唐求集一卷

唐唐求撰與顧非熊同時藝文志不載

李山甫集一卷

唐魏博從事李山甫撰唐末進士不第

邵謁集一卷

唐國子生曲江邵謁撰集後有胡賓王者為之序言其沒後降巫賦詩自稱邵先輩殆若今世請大仙之類耶

李推官披沙集六卷

唐李咸用撰其八世孫兼孟達居宛陵亦能詩嘗為台州出其家集求楊誠齋作序

于武陵集一卷

周濱集一卷

陳光集一卷

劉威集一卷

以上皆唐人于武陵大中進士

案此句原本脫漏今據文獻通攷補入

餘莫詳出處濱集藝文志不載

殷文珪集一卷

唐殷文珪撰乾寧五年進士後仕南康其子曰崇義

歸朝更姓名即湯悅也

盧士衡集一卷

後唐盧士衡撰天成二年進士

劉昭禹集一卷

湖南天策府學士桂陽劉昭禹撰

熊皦屠龍集一卷

五代晉九華熊皦撰後唐清泰二年進士集中多下

第詩蓋老於場屋者

符蒙集一卷

題符侍郎同光三年進士也同年四人蒙初為狀頭  
覆試為第四

李建勲集一卷

案高棟唐詩品彙作三卷

南唐宰相李建勲撰

孟賓于集一卷

五代進士孟賓于撰仕湖南江南

廖匡圖集一卷

湖南從事廖匡圖撰

江為集一卷

五代建安江為撰為王氏所誅當漢乾祐中

劉乙集一卷

似唐末五代人藝文志不載其詩怪而不律亦不工

文丙集一卷

稱布衣文丙未詳何人

蔣吉集一卷

蘇拯集一卷

案文獻通攷作蘇拯原本作極誤今改正

王周集一卷

皆未詳何人

顧非熊集一卷

唐盱眙主簿顧非熊撰

案唐書顧非熊大中盱眙主簿原本誤作台州今改正

況之子會昌五年進士

吳興集一卷

唐僧吳興謝皎然清書撰康樂十世孫顏魯公為刺

史與之唱酬其後刺史于頔為作集序所居龍興寺之西院今天寧寺是也又嘗居杼山寺

靈一集一卷

唐僧與皇甫曾同時

無可集一卷

唐僧賈無可撰島弟也

禪月集十卷

案唐詩紀事作西嶽集十卷文獻通攷作寶月詩一卷此本作禪月集者貫休號禪

月上人因

名其集也



唐僧蘭溪貫休撰姓姜氏後入蜀

白蓮集十卷

唐僧齊己撰長沙胡氏

棲白集一卷

脩睦東林集一卷

尚顏供奉集一卷

皆唐僧貫休而下盡唐末人也

薛濤集一卷

唐成都妓女薛濤撰字洪度號薛校書世傳奏授恐  
無是理殆一時州鎮褒借為戲如今世白帖借補之  
類耶濤得年最長至近八十

李季蘭集一卷


唐女冠與劉長卿同時相譏調之語見中興間氣集  
魚元機集一卷

唐女冠坐妒殺女婢抵死余嘗言婦女從釋入道有  
司不禁亂禮法敗風俗之尤者

原註事見  
補妒記



直齋書錄解題卷十九



總校官庶吉士

臣

侍

朝

校對官庶吉士

臣

何思鈞

謄錄監生

臣

袁文宿

欽定四庫全書薈要

史部

直齋書錄解題卷

二十至  
二十二



詳校官員外郎臣潘紹觀

欽定四庫全書薈要卷九千七百二十六

史部

直齋書錄解題卷二十  
宋 陳振孫 撰

詩集類下

直齋書錄解題  
集一卷

江南進士後歸朝

李九齡集一卷

洛陽李九齡撰乾德二年進士第三人

巴東集三卷

丞相萊國忠愍公下邳寇準平仲撰初以將作監  
丞知巴東縣自擇其詩百餘首且為之序今刻於  
巴東

忠愍公集三卷

河陽守范雍得寇公詩二百首為三卷今刻板道州  
草堂集二卷

處士鉅鹿魏野仲先撰

鉅鹿東觀集十卷

野之子閑集其父詩四百篇薛田為之序野既沒贈著作郎故以東觀名集

潘逍遙集一卷

案文獻通考作三卷

四門助教廣陵潘閬逍遙撰

案晁公武讀書志作大名

嘗賜及

第後坐追奪或云坐盧多遜黨追捕變姓名僧服入中條山卒於泗州又有嚴陵刻本同但少卷末三首東里楊聘君集一卷

處士鄭圃楊朴契元撰太宗嘗召對拜郎中不受以



其子為長水尉

滕工部集一卷

滕白撰篇首寄陳搏知為國初人又有右省懷山中  
及臺中寄朱從事詩則其敦歷清要亦多矣史傳亡  
所見未有考也後見實錄載嘗以戶部判官為南面  
前轉運使坐軍糧損折免官

王岳集一卷

王岳撰集中有春日感懷上滕白郎中蓋亦國初人

又有聖駕親征河東及有甲午避寇全家欲下荆南之語則是李順亂蜀之歲也蓋蜀人也耶

漁舟集五卷

案文獻通考作一卷

處士成都郭震希聲撰自稱汾陽山人李旼為作集序淳化四年忽作詩曰朝出東門遊東門好春色青  
青原上草莫放征馬食詣闕獻書言蜀利病未幾順  
賊已作矣

王初歌詩集一卷

王初撰未詳何人有延平天慶觀詩當是祥符後人也

書臺集三卷

處士南隆朱有大有撰自稱雲臺山人天禧中王晦叔守蜀以古風六十言遺之書臺者其所居坊名也  
甘棠集一卷

知制誥上蔡孫僅鄰幾撰咸平元年進士第一人後其兄何一榜嘗從何通判陝府以所賦詩集而序之

首篇曰甘棠思循吏故以名集僅兄弟皆不壽故不  
大顯

錢希白歌詩二卷

翰林學士吳越錢易希白撰廢王侑之子咸平二年  
進士第二人景德二年制科初錢氏歸國羣從皆補  
官獨易與兄昆不見錄遂刻志讀書皆第進士昆至  
諫議大夫易子彥遠明逸又皆以賢良方正入等宋  
興父子兄弟制舉登科者惟錢氏一門易有集百五

十卷未見家止有此及滑稽集四卷而已

和靖集三卷西湖紀逸一卷

案宋史藝文志和靖詩集七卷又詩二卷

處士錢唐林逋君復撰梅聖俞為之序紀逸者近時  
桑世昌澤卿所輯遺文逸事也

清風集一卷

職方員外郎鮑當撰

石曼卿歌詩集一卷

祕閣校理宋城石延年曼卿撰自為序石介復為作

序其仕以三舉進士為三班奉職出處詳見歐陽公所  
作墓志

呂文靖集五卷

丞相許國文靖公壽春呂夷簡坦夫撰文靖不以文  
鳴而其詩清潤和雅未易及也

藥名詩一卷

司封郎中陳亞亞之撰咸平五年進士有集三卷藥  
名詩特其一體爾如馬嘶曾到寺犬吠乍行村吏辭

如賀日民送似迎時皆佳句不在此集也

金陵覽古詩三卷

虞部員外郎楊備撰億之弟也

李問集一卷

國子博士廣陵李問舜俞撰

晁君成集十卷別集一卷

新城令晁端友君成撰東坡為作序補之其子也

擊壤集二十卷

處士共城邵雍堯夫撰自為之序始自共城徙河南  
卒於熙寧十年諡康節

臨川詩選一卷

汪藻彥章得半山別集皆罷相後山居時老筆過江  
失之遂於臨川集錄出又言有表啓十餘篇不存一  
字

注荆公集五十卷

案文獻通攷  
作十五卷

參政眉山李璧季章撰謫居臨川時所為也助之者



曾極景建魏鶴山為作序

注東坡集四十二卷年譜目錄各一卷

司諫吳興施元之德初與吳郡顧景蕃共為之元之  
子宿從而推廣且為年譜以傳於世陸放翁為作序  
頗言注之難蓋其一時事實既非親見又無故老傳  
聞有不能盡知者噫豈獨坡詩也哉注杜詩者非不  
多往往穿鑿傳會皆臆決之過也沈括先與坡同在  
館閣後察訪兩浙至杭求坡近詩籤貼以為訕懟李

定等論詩置獄實本於括云

山谷集三十卷外集十一卷別集二卷

案宋史藝文志外集作十四卷

黃庭堅魯直撰江西所刻詩派即豫章前後集中詩也別集者慶元中莆田黃汝嘉增刻

山谷編年詩集三十卷年譜二卷

山谷詩文其甥洪氏兄弟所編斷自進德堂以後今外集所載數卷有晚年刪去者故任子淵所注亦惟取前集而已監丞黃當子耕者其諸孫也既會粹別

集復盡取其平生詩以歲月次第編錄且為之譜今刊板括蒼青城史容儀甫近注外集外集者謂山谷曾欲以前後倣莊子為內外也

后山集六卷外集五卷

陳師道無已撰亦於正集中錄出入詩派江西宗派之說出於呂本中居仁前輩固有議其不然者矣后山雖曰見豫章之詩盡棄其學而學焉然其造詣平淡真趣自然寔豫章之所缺也

注黃山谷詩二十卷注后山詩六卷

案原本脫注后山詩六卷與解題中

二集皆取前集二語不符今據文獻通考補入

新津任淵子淵注鄱陽許尹為序大抵不獨注事而兼注意用功為深二集皆取前集陳詩以魏衍集記冠焉

盧載雜歌詩一卷

盧載厚元撰集中有與胡則錢惟演往來詩

琴軒集一卷

題南榮浪翁李有慶撰與石昌言任師中同時卷末  
贈答十二絕闕其六其曰癸巳歲者殆皇祐中耶

元章簡玉堂集十卷

參政元絳厚之撰

劉景文集一卷

左藏庫使知隰州劉季孫景文撰環慶死事將平之  
子也東坡嘗薦之坡在杭季孫寄詩有四海共知霜  
鬢滿重陽曾插菊花無之句其詩慷慨有氣如其為

人

廣諷味集五卷

吏部侍郎南京王欽臣仲至撰

海門集八卷

渤海張重撰有上蘇子瞻內翰詩又有與張伯玉遊鑑湖晚歸詩伯玉知越州當嘉祐末而東坡為翰苑在元祐間重皆與同時特未詳其人

王岐公宮詞一卷

王珪禹玉撰

逸民鳴一卷

盱江李樵撰泰伯之姪孫

湛推官集一卷

長樂湛鴻季潛撰紹聖初韓昌國序

青山集三十卷

朝奉郎當塗郭祥正功父撰初見賞於梅聖俞後見知於王介甫仕不達而卒李端叔晚寓其鄉祥正與

之爭名未嘗同堂語至為俚語以譏誚之則其為人不足道也

方祕校集

莆田方惟深子通撰其父屯田龜年葬吳遂為吳人與朱伯原厚善以女嫁伯原之子嘗舉進士冠其鄉不第晚得興化軍助教年八十三以卒王荊公最愛其詩精詣警絕始余得其詩二卷乃其姪孫蕭山宰翱所編後乃知莆中嘗刊板為十卷且載程俱致道



所作墓誌於末曾慥詩選直以為姑蘇人者誤也詩選又言荆公愛其春江渺渺一絕手書之遂載臨川集曾紆南游記舊亦云而其詩則客帆收浦者也二詩皆不在今集中豈以臨川集已收故耶二本大畧同亦微有出入

慶湖遺老集九卷拾遺二卷

朝奉郎共城賀鑄方回撰自序言外監知章之後且推本其初出王子慶忌以慶為姓居越之湖澤今所

謂鏡湖者本慶湖也避漢安帝及清河王諱改為賀氏慶湖亦轉為鏡未知其說何所據也其東山樂府張文潛序之鑄後居吳下葉少蘊為作傳詳其出處且言與米芾齊名然鑄生皇祐壬辰視米芾猶為前輩也

操縵集五卷

周邦彥撰亦有前集中所無者

得全居士集三卷

趙鼎元鎮撰全集號忠正德文其曾孫璧別刊其詩  
附以樂府陸游曰忠簡謫朱崖臨終自書銘旌曰身  
騎箕尾歸天上氣作山河壯本朝嗚呼可不謂偉人  
乎

高隱集七卷

高隱處士蘄春林敏功子仁撰

案宋史藝文志有林敏功集十卷曾端伯

作高隱小傳稱林敏功兄弟皆隱君子也原本脫姓氏今補入

嘗以春秋預鄉薦不

第有詩文百卷號蒙山集兵火後不存

無思集四卷

林敏脩子來撰敏功之弟

柯山集二卷

齊安潘大臨邠老撰所謂滿城風雨近重陽者也

溪堂集五卷補遺二卷

臨川謝逸無逸撰

竹友集七卷

謝邁幼槃撰逸之弟

日涉園集十卷

廬山李彭商老撰公擇之從孫

清虛集一卷

豫章洪朋龜父撰

老圃集一卷

諫議大夫洪芻駒父撰

西渡集一卷

案原本作西漢集今  
據文獻通攷改正

中書舍人洪炎玉父撰洪氏兄弟四人其母黃曾直

之妹不淑早世所為賦毀壁者也龜父舉進士不第  
其季羽鴻父坐上書元符入籍終其身芻炎皆貴而  
芻靖康失節貶廢羽詩不傳

陵陽集四卷

案文獻通考作三卷宋  
史藝文志作十五卷

別集二卷

韓駒子蒼撰

還還集二卷

直龍圖閣江陵高荷子勉撰

東湖集三卷

樞密豫章徐俯師川撰禧之子亦魯直諸甥也思陵以黃庭堅故召用之丞相呂頤浩作書具道上旨而一時或言其由中人以進其初除大坡也程俱在西掖繳奏不行奏祠去其然乎否耶然俯在位亦不聞有所建明也

東萊集二十卷外集二卷

中書舍人呂本中居仁撰希哲之孫好問之子而祖謙之伯祖也撰江西宗派者後人亦以其詩入派中

具茨集十卷

案文獻通攷作三卷

晁沖之叔用撰沖之在羣從中亦有才華而獨不第  
紹聖以來黨禍既作超然獨往侍郎公武子止蓋其  
子也

青溪集一卷

臨川汪革信民撰呂居仁序之

倚松集二卷

臨川饒節德操撰後為僧號如璧



遠遊堂集二卷

知江州蘄春夏倪均父撰

歸叟集一卷

開封王直方立之撰其高祖顯事晉邸至樞密使直方喜從蘇黃諸名士游家有園池娶宗女假為承奉郎自號歸叟年甫四十而死

李希聲集一卷

祕書丞李錡希聲撰與徐師川潘邠老同時

案與徐師川二

句原本脫漏今據  
文獻通攷補入

楊信祖集一卷

楊符信祖撰未詳出處

陳留集一卷

開封江端本子之撰

案江端本開封人原  
本誤作開州今改正以上至林

子仁皆入詩派

七里先生自然集七卷

江端友子我撰端本兄也休復鄰幾之孫其父懋相

有遺澤子我以遜端本靖康初吳敏元中薦子我召  
見賜出身為京官後至太常少卿

臨漢居士集七卷

南豐曾紘伯容撰其父阜子山於子固為從兄弟

懷峴居士集六卷

曾思顯道撰紘之子也阜嘗將漕湖南後家襄陽紘  
父子皆有官而皆高亢不仕楊誠齋序其詩以附詩  
派之後

見南山集二十卷

祕閣修撰吳興劉燾無言撰

案劉燾字無言原本作劉燾言誤今改正

潛山集三卷

中書舍人龍舒朱翌新仲撰

曾文清集十五卷

禮部侍郎章貢曾幾吉父撰

案曾幾字吉父原本作士父誤今改正

本

朝曾氏三望最初溫陵宣靖公公亮明仲次南豐舍人輩子固兄弟然其祖致堯起家又在溫陵之先矣

其後則幾之族也自贛徙河南與其兄楸叔夏開天  
游皆嘗貳春官楸至尚書開沮和議得罪並有名於  
世又有長兄弼為湖北提舉學士渡江溺死幾以其  
遺澤補官銓試第一賜上舍出身清江三孔之甥也  
紹興末幾已老始擢用乾道中年八十三以死號茶  
山先生其子逢逮皆顯於時

天台集十卷外集四卷長短句三卷附

臨海陳克子高撰李庚子長跋其後云刪定鄉人也

少時侍運判公貽序宦學四方曾慥詩選叙為金陵人蓋失其實今考集中首末多在建康且嘗就試焉當是僑寓也詩選又言不事科舉以呂安老薦入幕府得官按集有聞榜二絕則嘗應舉矣又有甲午歲所作詩云三十四則其生當在元豐辛酉得官入幕蓋已老矣詩多情致詞尤工

簡齋集十卷

參政洛陽陳與義去非撰其先蓋蜀人東坡所傳陳

希亮公弼者其曾祖也崇觀間尚王氏經學風雅幾廢絕而去非獨以詩鳴中興後遂顯用

西溪居士集五卷

案姚寬集號西溪居士原本作西漢誤今改正

剡川姚寬令威撰待制舜明廷輝之子兄宏令聲為刪定官得罪秦檜死大理獄寬為六部監門逆亮入寇寬言木德所照必無虞言驗將除郎召對得疾仆殿上卒遂用其弟憲令則後至執政

集句詩三卷

江陰葛次仲亞卿撰勝仲之兄兄弟皆為大司成

廬溪集七卷

宜敷文閣廬陵王庭珪民瞻撰政和八年進士仕不  
合棄去隱居數十年坐作詩送胡邦衡除名徙辰州  
年已七十矣阜陵初政名為國子監主簿九十餘乃  
終寄祿纔承奉郎澤竟不及後周益公在位欲委曲  
成就之卒不可

韋齋小集一卷



朱松喬年撰

玉瀾集一卷

朱棣逢年撰韋齋之弟晦庵之叔父也嘗夢為玉瀾堂之游甚異有詩紀之

雲壑隱居集三卷

南城蔡柟堅老撰宣和以前人沒於乾道庚寅曾公卷呂居仁輩皆與之倡和

陳正獻集十卷

丞相謚正獻公莆田陳俊卿應求撰紹興八年進士  
第二人乾淳間名相與虞并父異論去國

靜泰堂集十卷

參政莆田龔茂良實之撰黃公度以莆人魁天下陳  
正獻次之故事拜黃甲推最老者一人最少者一人  
是歲茂良年最少莆人以為盛事後參大政相位久  
虛實行相事坐撻曾覲直省官忤阜陵意用謝廓然  
賜出身入臺擊罷之遂謫英州以沒其風節凜凜為

世名臣

寓山集三卷

案文獻通攷作三十卷

吳興沈仲喆明遠撰丞相該之姪紹興五年進士改官為江西運管嘗為悲扇工詩忤魏良臣陷以深文奪三官不得志以卒

劔南詩藁二十卷續藁六十七卷

陸游務觀撰初為嚴州刻前集藁止淳熙丁未自戊申以及其終當嘉定庚午二十餘年為詩益多其幼

子適復守嚴州續刻之篇什之富以萬計古所無也  
雪巢小集二卷

東魯林憲景思撰初寓吳興從徐度敦立游後為參  
政賀允中子忱孫壻寓臨海其人高尚詩清澹五言  
四韻古句尤佳殆逼陶謝梁谿尤延之誠齋楊廷秀  
皆為之序且為雪巢賦及記余為南城其子遊謁至  
邑以家集見示愛而錄之及守天台則板行久矣視  
所錄本稍多然其暮年詩似不逮其初往往以貧為

累不能不衰索也

王季夷北海集二卷

北海王岵季夷撰紹淳間名士寓居吳興陸務觀與之厚善三子甲田申皆登科

易足居士自鳴集十五卷

鄱陽章甫冠之撰居吳下自號轉菴作易足堂韓無咎為之記

屏山七者翁十卷

從事郎崇安劉瑀平父撰子翬彥沖之子也

玉雪小集六卷外集七卷

太常博士龍泉何偁德揚撰隆興初在朝言和議觸  
時相去後遂不復召歷麾節而卒

雪山集三卷

富川王質景文撰質游太學治詩有聲仕為樞屬嘗  
著詩解三十卷未之見也

景物類要詩十卷

東陽曹冠宗臣撰隨物為題類事成詩凡二百餘篇  
冠為秦檜客與其孫壘同登甲科未幾秦亡奪前名  
恩數再赴廷試仕至知郴州

同菴集一卷

吳興施士衡德求撰嘗試中教官為宣州簽幕坐廢  
雖牽復仕竟不進

枏山老人集八卷

龍泉李相文成撰

三逕老人硃碣集十三卷

福建提舉常平昭武杜圯受言撰胡憲原仲為之序  
其上世龍圖閣直學士鎬本常州無錫人其孫天章  
閣待制圯於圯為曾祖

穀城集五卷

建安黃銖子厚撰晦庵作序極稱之

松坡集七卷樂府一卷

丞相豫章京鏜仲遠撰鏜使金執節驟用其在相位



當韓侂冑用事無所立

白石道人集三卷

鄱陽姜夔堯章撰千巖蕭東夫識之於年少客游以  
其兄之子妻之石湖范至能尤愛其詩楊誠齋亦愛  
之嘗稱其歲除舟行十絕以為有裁雲縫月之妙思  
敲金戛玉之奇聲夔頗解音律進樂書免解不第而  
卒詞亦工

轉菴集一卷

閤門舍人永嘉潘檉德久撰

王祕監集四卷

永嘉王栴木叔撰

平菴悔藁十五卷後編六卷

案宋史藝文志作丙辰悔藁四十七卷

太府卿松陽項安世平父撰悔藁者以語言得罪悔不復為也自序當慶元丙辰後編自丁巳終壬戌

醒菴遺珠集十卷

臨川俞國寶撰淳熙前人

東平集二十七卷

輦豐仲至撰淳熙甲辰進士

白石丁藁一卷

三山黃景說巖老撰淳熙辛丑進士

復齋漫藁二卷

知台州黃當子耕撰

梅山詩藁六卷續藁五卷

案文獻通考續藁作十五卷

括蒼姜特立邦傑撰以父死事得西班牙累舉不第晚

為閣職春坊攀附已酉龍飛恩至節度使周益公留  
衛公皆為其所間特立詩亦麤佳韓无咎陸務觀皆  
愛之本亦士人也塗轍一異儼然誓御之態豈其居  
使之然耶

冷然齋集十二卷

山陰蘇洵召叟撰丞相子容四世孫師德仁仲之孫  
曾徂父詩詞一卷

知台州曾惇徂父撰紆之子也皆在台時所作

瓦全居士詩詞二卷

太常博士寧海王澡身甫撰初名津字子知

疎寮集三卷

四明高似孫續古撰少有俊聲登甲辰科不自愛重  
為館職上韓侂冑生日詩九首皆暗用錫字為時清  
議所不齒晚知處州貪酷尤甚其讀書以隱僻為博  
其作文以怪澀為奇至有甚可笑者就中詩猶可觀  
也

徐照集三卷

永嘉徐照道暉撰自號山民

案文獻通攷  
山民作天民

道暉又字靈暉致中又字靈淵紫芝又字靈秀翁卷

又字靈舒是為四靈水心為選詩

隨齋  
批注

徐璣集二卷

徐璣致中撰

翁卷集一卷

翁卷靈舒撰

趙師秀集二卷別本天樂堂集一卷

趙師秀紫芝撰四人者號永嘉四靈皆為晚唐體者也惟師秀嘗登科改官亦不顯

李孟達集一卷

宗正丞宣城李兼孟達撰唐末李咸用披沙集者即其遠祖也嘗知台州時稱善士

柯東海集十五卷

莆田柯夢得東海撰嘗試春官不第

山中集一卷

莆田趙庚夫仲白撰兩上春官不第以取應得右選  
不得志而沒劉潛夫志其墓擇其詩百篇屬趙南塘  
序而傳之

磬沼集一卷

崇仁羅鑑正仲撰樞密春伯之從弟磬沼者為池因  
地曲折如磬然

茅齋集二卷



南城鄧繼祖撰

梔林集十卷

吳郡沈繼祖撰慶元初有為察官者家富川豈即其人耶人固不足道詩亦無可觀者

花翁集一卷

開封孫惟信季蕃撰在江湖中頗有標致多見前輩多聞舊事善雅談長短句尤工嘗有官棄去不仕

惠崇集十卷

淮南僧惠崇撰與潘閬同時在九僧之數亦善畫

天竺靈苑集三卷採遺一卷

錢塘僧遵式撰所謂式懺主者也

渚宮集三卷

錢塘僧文瑩道溫撰及識蘇子美嘗題其詩後欲挽  
致於歐陽永叔而瑩辭不往老於荊州之金鑾鄭毅  
為作序

揀金集一卷

螺江僧可尚撰有送徐鉉詩蓋國初人

螺江集一卷

僧有朋撰號困山禪師族陳氏閩帥巖六世孫

參寥集十二卷

僧道潛撰唐人舊有號參寥子者用莊子語也

物外集三卷

僧德洪覺範撰

瀑泉集十二卷

僧祖可正平撰蘇養直之弟有惡疾號癩可

真隱集三卷

僧善權巽中撰靖安人落魄嗜酒

化庵湖海集二卷

僧法具圖復撰吳興人

浯溪集二十一卷

僧顯萬撰洪景廬作序前二卷為賦餘皆詩也

女郎謝希孟集二卷

閩人謝景山之妹嫁陳安國年三十三而死其詩甚可觀歐公為之序言有古淑女幽閒之風雅非特婦人之言也景山者按歐陽詩話言謝伯初字景山當天聖景祐間以詩知名余謫夷陵景山方為許州法曹以長韻見寄頗多佳句仕不偶困窮以卒詩亦不見於世此序又言景山少以進士一舉甲科攷登科記天聖二年甲科但有謝伯景而謝伯初者乃在寶元元年公夷陵當景祐三年景山已為法曹則非

寶元登第者名字差齟如此未可攷也

處士女王安之集一卷

簡池王亢子倉之女尚恭字安之年二十未嫁而死  
乾道戊子也亢自志其墓有任公鴈者為作集序援  
歐公所序謝希孟為比而稱其詩不傳今余家有之  
任蓋未之見也

英華集三卷

李季萼死後為鬼仙事見夷堅志縉雲人傳其集亦

怪矣

直齋書錄解題卷二十

欽定四庫全書薈要卷九千七百二十七

史部

直齋書錄解題卷二十一 宋 陳振孫 撰

歌詞類

花間集十卷

蜀歐陽炯作序稱衛尉少卿字宏基者所集未詳何人其詞自溫飛卿而下十八人凡五百首此近世倚聲填詞之祖也詩至晚唐五季氣格卑陋千人一律而長短句獨精巧高麗後世莫及此事之不可曉者



放翁陸務觀之言云爾

南唐二主詞一卷

中主李璟後主李煜撰卷首四闋應天長望遠行各  
一浣溪沙二中主所作重光嘗書之墨迹在盱江晁  
氏題云先皇御製歌詞余嘗見之於麥光紙上作撥  
鐙書有晁景迂題字今不知何在矣餘詞皆重光作  
陽春錄一卷

南唐馮延巳撰高郵崔公度伯易題其後稱其家所

藏最為詳確而尊前花間諸集往往謬其姓氏近傳  
歐陽永叔詞亦多有之皆失其真也世言風乍起為  
延己所作或云成幼文也今此集無有當是幼文作  
長沙本以寘此集中殆非也

家宴集五卷

序稱子起失其姓氏雍熙丙戌歲也所集皆唐末五  
代人樂府視花間不及也末有清和樂十八章為其  
可以侑觴故名家宴也

珠玉集一卷

晏元獻公殊撰其子幾道嘗言先公為詞未嘗作婦人語以今攷之信然

張子野詞一卷

都官郎中吳興張先子野撰李常公擇為六客堂子野與焉所賦詞卒章云也應傍有老人星蓋以自謂是時年八十餘矣東坡倅杭數與唱酬聞其買妾為之賦詩首末皆用張姓事吳興志稱其晚年漁釣自

適至今號張釣魚灣死葬弁山下在今多寶寺案歐陽集有張子野墓誌死於寶元中者乃博州人名姓字偶皆同非吳中之子野也

杜壽域詞一卷

京兆杜安世壽域撰未詳其人詞亦不工

六一詞一卷

歐陽文忠公修撰其間多有與花間陽春相混者亦有鄙褻之語一二廁其中當是仇人無名子所為也

樂章集九卷

柳三變耆卿撰景祐元年進士官至屯田員外郎世號柳屯田初磨勘及格昭陵以其浮薄罷之後乃更名永其詞格固不高而音律諧婉語意妥帖承平氣象形容曲盡尤工於羈旅行役若其人則不足道也東坡詞二卷

蘇文忠公軾撰集中戚氏叙穆天子西王母事世不知所謂李端叔跋詳之蓋在中山燕席間有歌此闕

者坐客言調美而詞不典以請於公公方觀山海經  
即叙其事為題使妓再歌之隨其聲填寫歌竟篇就  
纔點定五六字而已端叔時在幕府目擊必不誣或  
言非坡作豈不見此跋耶今坡詞多有刊去此篇者

山谷詞一卷

黃太史庭堅撰

淮海集一卷

秦觀撰

晁无咎詞一卷

晁補之撰晁嘗云今代詞手惟秦七黃九他人不能及也然二公之詞亦自有不同者若晁无咎佳者固未多遜也

后山詞一卷

陳師道撰

間適集一卷

晁端禮次膺撰熙寧六年進士兩為縣令忤上官坐

保甲事中以危法廢徙晚乃以承事郎為大晟府協律三閱月而卒其從姪說之志其墓

晁叔用詞一卷

晁沖之撰壓卷漢宮春梅詞行於世或云李漢老作非也

小山集一卷

晏幾道叔原撰其詞在諸名勝中獨可追逼花間高處或過之其為人雖縱弛不羈而不苟求進尚氣磊



落未可貶也

清真詞二卷後集一卷

周邦彥美成撰多用唐人詩語櫟括入律渾然天成  
長調尤善鋪叙富艷精工詞人之甲乙也

東山寓聲樂府三卷

賀鑄方回撰以舊譜填新詞而別為名以易之故曰  
寓聲

東堂詞一卷

毛滂澤民撰本以斷魂分付潮回去見賞東坡得名而他詞雖工未有能及此者

溪堂詞一卷

謝逸無逸撰

竹友詞一卷

謝邁幼槃撰

冠柳集一卷

王觀通叟撰號王逐客世傳霜瓦鴛鴦其作也詞格

不高以冠柳自名則可見矣

姑溪集一卷

李之儀端叔撰

聊復集一卷

安定郡王趙令時德麟撰

後湖詞一卷

蘇庠養直撰

大聲集五卷

万俟雅言撰嘗遊上庠不第後為大晟府製撰周美  
成田不伐皆為作序

石林詞一卷

葉夢得少蘊撰

蘆川詞一卷

三山張元幹仲宗撰坐送胡邦衡詞得罪秦相者也  
赤城詞一卷

陳克子高撰詞格頗高麗晏周之流亞也

簡齋詞一卷

陳與義撰

劉行簡詞一卷

劉一止撰嘗為曉行詞盛傳於京師號劉曉行

順庵樂府五卷

康與之伯可撰與之父倬惟章詭誕不檢事見揮麈錄與之又甚焉嘗挾吳下妓趙芷以遁與蘇師德仁仲有隙遂與蘇玘訓直之獄玘仁仲之子而常同子

正之壻也與之受知於子正一朝背之士論不齒周  
南仲嘗為作傳道其實如此世所傳康伯可詞鄙褻  
之甚此集頗多佳語陶定安世為之序王性之蘇養  
直皆稱之而其人不自愛如此不足道也

樵歌一卷

朱敦儒希真撰

初寮詞一卷

王安中撰

丹陽詞一卷

葛勝仲撰

酒邊集一卷

戶部侍郎向子諲伯恭撰自號薌林

漱玉集一卷

易安居士李氏清照撰元祐名士格非文叔之女嫁東武趙明誠德甫晚歲頗失節別本分五卷

得全詞一卷

趙忠簡公元鎮撰

焦尾集一卷

韓元吉撰

放翁詞一卷

陸游撰

石湖詞一卷

范成大撰

友古詞一卷



左中大夫莆田蔡伸伸道撰自號友古居士君謨之孫

相山詞一卷

王之道彥猷撰

浩歌集一卷

蔡耒堅老撰

于湖詞一卷

張孝祥安國撰

稼軒詞四卷

寶謨閣待制濟南辛棄疾幼安撰信州本十二卷卷  
視長沙為多金亮之殞朝廷乘勝取四十郡未幾班  
師復棄數郡京東義士耿京據東平府遣掌書記辛  
棄疾赴行在京後為裨將張安國所殺棄疾擒安國  
以歸斬之詳見朝野雜記

可軒曲林一卷

盱江黃人傑叔萬撰

王武子詞一卷

未詳其名字

樂齋詞一卷

向瀉豐之撰

鳳城詞一卷

三山黃定泰之撰乾道壬辰榜首

竹坡詞一卷

周紫芝撰

介庵詞一卷

趙彥端撰

竹齋詞一卷

吳興沈瀛子壽撰

書丹詞一卷

眉山程垓正伯撰王偁季平為作序

燕喜集一卷

曹冠宗臣撰

退圃詞一卷

鎮洮馬寧祖奉先撰

省齋詩餘一卷

衡陽廖行之天民撰

克齋詞一卷

茗溪沈端節約之撰

敬齋詞一卷

臨川吳鑑仲權撰

逃禪集一卷

清江楊无咎補之撰世所傳江西墨楊即其人也

索去華詞一卷

豫章索去華宣卿撰

樵隱詞一卷

毛幵平仲撰

盧溪詞一卷

王庭珪民瞻撰

知稼翁集一卷

考功郎官莆田黃公度師憲撰紹興戊午大魁坐與  
趙忠簡往來得罪秦檜流落嶺表更化召對為郎未  
幾死年財四十八

呂聖求詞一卷

樵李呂渭老聖求撰宣和末人嘗為朝士

退齋詞一卷

長沙侯延慶季長撰壓卷為天寧節萬年歡又有庚

寅京師作水調則大觀元年也

金石遺音一卷

石孝文次仲撰

歸愚詞一卷

葛立方常之撰

信齋詞一卷

葛郊謙問撰

澗壑集一卷



雙井黃談子默撰

嬾窟詞一卷

東武侯寔彥周撰其曰母舅晁留守者謙之也紹興中以直學士知建康

王周士詞一卷

長沙王以寧周士撰

哄堂集一卷

案文獻通攷作哄堂原本作哄今改正

盧炳叔易撰

定齋詩餘一卷

三山林淳太沖撰

漫堂集一卷

豐城鄧元南秀撰

養拙堂詞集一卷

董鑑明仲撰

坦庵長短句一卷

趙師俠介之撰

晦庵詞一卷

李處全粹伯撰淳熙中侍御史

近情集一卷

鄱陽王大受仲可撰

野逸堂詞一卷

歷陽張孝忠正臣撰

松坡詞一卷

京鏜仲遠撰

默軒詞一卷

豫章劉德秀仲洪撰

案劉德秀字仲洪原本作沖洪誤今改正

慶元中為

簽樞

岫雲詞一卷

長沙鍾將之仲山撰嘗為編修官

西樵語業一卷

廬陵楊炎止濟翁撰

雲谿樂府四卷

魏子敬撰未詳何處人

西園鼓吹二卷

徐得之思叔撰

李東老詞一卷

李叔獻東老撰

東浦詞一卷

韓玉溫甫撰

李氏花萼集五卷

廬陵李氏兄弟五人洪子大漳子清泳子永詮子召  
淵子秀皆有官闕

好庵遊戲一卷

莆田方信孺字若撰開禧中使入金國後至廣西漕  
鶴林詞一卷

簡池劉光祖德脩撰紹熙名臣為御史起居郎晚以  
雜學士終蜀之耆德有文集未見

笑笑詞集一卷

臨江郭應祥承禧撰嘉定間人自南唐二主詞而下  
皆長沙書坊所刻號百家詞其前數十家皆名公之  
作其末亦多有濫吹者市人射利欲富其部帙不暇  
擇也

蕭閒集六卷

蔡伯堅撰靖之子陷金者

吳彥高詞一卷

吳激彥高撰米元章之壻亦陷金二人皆貴顯

白石詞五卷

姜夔堯章撰

西溪樂府一卷

姚寬令威撰

洮湖詞一卷

金壇陳從古晞顏撰

審齋詞一卷

東平王千秋錫老撰



海野詞一卷

曾覲撰孝宗潛邸人怙寵依勢世號曾龍者也龍名

大淵

蓮社詞一卷

案張掄詞名蓮社原本作蓮社誤今改正

張掄才甫撰

梅溪詞一卷

汴人史達祖邦卿撰張約齋磁為作序不詳何人

竹屋詞一卷

高觀國賓王撰亦不詳何人高郵陳造併與史二家  
序之

劉改之詞一卷

襄陽劉過改之撰

冷然齋詩餘一卷

蘇洵召叟撰

蒲江集一卷

永嘉盧祖臯申之撰

欵乃集八卷

昭武嚴次山撰欵音暖乃如字余嘗辨之甚詳

花翁詞一卷

孫惟信季蕃撰

蕭閒詞一卷

韓畊子耕撰

注坡詞二卷

僊谿傅幹撰

注琴趣外篇三卷

江陰曹鴻注葉石林詞

注清真詞二卷

曹杓季中注自稱一壺居士

樂府雅詞三卷拾遺二卷

案文獻通攷樂府雅詞作十二卷

曾慥編

復雅歌詞五十卷

題鮑陽居士序不著姓名末卷言宮詞音律頗詳然

多有調而無曲

草堂詩餘二卷

類分樂章二十卷

羣公詩餘前後編二十二卷

五十大曲十六卷

萬曲類編十卷

皆書坊編集者

陽春白雪五卷

趙穉夫編取草堂詩餘所遺以及近人之詞

案此條原本脫

漏今據文獻通攷補入

直齋書錄解題卷二十一

欽定四庫全書薈要卷九千七百二十八

史部

直齋書錄解題卷二十二 宋 陳振孫 撰

章奏類

凡無他文而獨有章奏及雖有他文而章奏復獨行者亦別為一類

漢名臣奏一卷

案隋志刑法類有漢名臣奏事三十卷唐志已亡其一中興書目僅存其二一為孔光一為唐林今惟唐



林而已所言皆莽朝事無足論者姑以存古云爾

陸宣公奏議二十卷

唐宰相嘉興陸贄敬輿撰又名勝子集

令狐公表奏十卷

唐宰相華原令狐楚慤士撰楚長于應用嘗以授李

商隱

范文正公奏議二卷

范仲淹撰

諫垣存藁三卷

韓琦撰

富文忠劄子十六卷

富弼撰平生歷官辭免陳情之文也

從諫集八卷

歐陽修撰

南臺諫垣集二卷

參政信安趙抃閱道撰

金  
五  
口  
人  
二  
三  
范蜀公奏議二卷

學士蜀忠文公成都范鎮景仁撰

包孝肅奏議十卷

樞密副使合肥包拯希仁撰

呂獻可章奏十六卷

案  
大  
獻  
通  
攷  
作  
二  
十  
卷

御史中丞呂晦獻可撰

經緯集十四卷

樞密副使會稽孫朴元規撰

傅獻簡奏議四卷

傅堯俞撰

范忠宣彈事五卷國論五卷

范純仁撰

范德孺奏議二十五卷

龍圖閣直學士范純粹德孺撰文正公三子中子純  
禮彛叟至尚書右丞純粹守邊有將才文正嘗謂仁  
得其忠禮得其靜粹得其畧其長子純祐天成尤英

悟不幸病廢蚤世富文忠深惜之為作墓誌

盡言集十三卷

諫議大夫元城劉安世器之撰

王明叟奏議二卷

翰林學士海陵王覲明叟撰坐黨籍謫臨江而卒其  
在朝專論蘇程朋黨之弊以為深患

丁騭奏議一卷

右正言毗陵丁騭撰元祐中在諫坡嘉祐二年進士

也

諫垣集二卷

陳瓘撰

閑樂奏議一卷

殿中侍御史建陽陳師錫伯修撰熙寧九年第進士  
裕陵素知其文行擢為第三人蘇軾知湖州師錫掌  
書記軾下御史獄師錫篤賓友之義安輯其家軾入  
西掖薦自代明著其事師錫在元豐已為察官坐論

進士習律罷去建中靖國再入未幾又罷

得得居士戇草一卷

正言眉山任伯雨德翁撰其論蔡卞章惇欲廢宣仁  
尤切故卞深恨之故獨貶嶺外

龔彥和奏議一卷

殿中侍御史河間龔夬彥和撰

案宋史龔彥和名夬此本作龔美誤今改

正以上四人皆建中靖國言事官極論蔡京者也

石林奏議十五卷

葉夢得撰

連寶學奏議二卷

寶文閣學士安陸連南夫鵬舉撰紹興初知饒州扞禦有功及和議成南夫知泉州上表畧曰不信亦信其然豈然又曰雖虞舜之十二州昔皆吾有然商於之六百里當念爾欺由是得罪

若溪奏議一卷

資政長城劉班希范撰

案文獻通攷作劉珏

嘗以同知三省樞



密院扈從隆祐南幸

毗陵公奏議二十五卷

張守撰

陳國佐奏議十二卷

禮部侍郎赤城陳公輔國佐撰政和三年上舍釋褐  
首選紹興初為諫官

胡忠簡奏議四卷

胡銓撰

玉山表奏一卷

汪應辰撰

陳正獻奏議二十卷表劄二十卷

陳俊卿撰

龔實之奏藁六卷

龔茂良撰

南軒奏議十卷

張栻撰

胡獻簡奏議八卷臺評二卷

禮部尚書會稽胡沂撰

梅溪奏議三卷

太子詹事樂清王十朋龜齡撰

省齋歷官表奏十二卷

周必大撰

軒山奏議二卷

王藺撰

北山慙議一卷

戶部侍郎濡須王邁少愚撰藺之兄開禧中諫用兵  
李祭酒奏議一卷

國子祭酒錫山李祥元德撰慶元初論救趙忠定得  
罪者

齊齋奏議三十卷掖垣繳論四卷銀臺章奏五卷臺諫  
論二卷昆命元龜說一卷

倪思撰

文史類

文心雕龍十卷

梁通事舍人東莞劉勰彥和撰勰後為沙門名慧地  
文章緣起一卷

梁太常卿樂安任昉彥昇撰但取秦漢以來不及六  
經

詩品三卷

案隋書經籍志有詩評三卷注云鍾嶸撰或曰詩品唐宋藝文志俱作詩評宋志訛一卷

梁記室參軍潁川鍾嶸仲偉撰以古今作者為三品

而評之上品十一人中品三十九人下品六十九人  
史通二十卷

唐崇文館學士劉知幾子玄撰新史以為工訶古人  
拙于用已然為書亦博矣史通者漢封司馬遷後為  
史通子而亦兼白虎通之義也

史通析微十卷

唐柳璨撰譏評劉氏之失

史例三卷

唐右補闕劉餗昀卿撰知幾次子也

賦門魚鑰十五卷

進士馬偁撰編集唐蔣防而下至本朝宋祁諸家律

賦格訣

詩格一卷

題魏文帝而所述詩或在沈約後其為假託明矣

詩格一卷詩中密旨一卷

唐王昌齡撰

評詩格一卷

唐李嶠撰嶠在昌齡之前而引昌齡詩格八病亦未

然也

二南密旨一卷

案唐書藝文志有賈島詩格一卷宋史藝文志作賈島詩格密旨一卷

唐賈島撰凡十五門恐亦依託

文苑詩格一卷

稱白氏尤非也

案自史通析微以下七條原本錯簡入歌詞類萬曲類編下今移正

詩式五卷詩議一卷



唐僧皎然撰以十九字括詩之體

風騷指格一卷

唐僧齊己撰

詩格一卷

沙門神或撰

處囊訣一卷

金華僧保暹撰

流類手鑑一卷

僧虛中撰

詩評一卷

桂林僧

原闕

淳撰

擬皎然十九字一卷

稱正字王元撰不知何人

炙轂子詩格一卷

唐王叡撰

詩格要律一卷

進士王夢簡撰

緣情手鑑詩格一卷

題樵人李宏宣撰未詳何人當在五代前

風騷要式一卷

徐衍述亦未詳何人

琉璃堂墨客圖一卷

案文獻通攷  
墨客作墨家

不著名氏

雅道機要二卷

前卷不知何人後卷稱徐寅撰

金針詩格一卷

白居易撰

續金針格一卷

梅堯臣撰大抵皆假託也

詩評一卷

不知名氏

御選句圖一卷

太宗皇帝所選楊徽之詩十聯真宗皇帝所選送劉  
琮詩八聯

唐詩主客圖一卷

唐張為撰所謂主者白居易孟雲卿李益鮑溶孟郊  
武元衡各有標目餘有升堂及門入室之殊皆所謂  
客也近世詩派之說殆出于此要皆有未然者

句圖一卷

唐李洞撰

文章玄妙一卷

唐任藩撰言作詩聲病對偶之類凡世所傳詩格大率相似余嘗書其末云論詩而若此豈復有詩矣唐末詩格汙下其一時名人著論傳後乃爾欲求高尚豈可得哉

詩苑類格三卷

李淑撰

林和靖摘句圖一卷

林逋詩句

詩三話一卷

無名氏

詩話一卷

歐陽修撰

續詩話一卷

司馬光撰

案續詩話一卷乃司馬光撰原序云詩話尚有遺者歐公文章聲名雖不可及然紀

事一也故敢續之原本稱唐李洞撰誤矣攷李洞另有句圖一卷或為鈔錄者所誤也今續詩話改正為

司馬光撰而李洞句  
圖另行補錄于前

楊氏筆苑句圖一卷續一卷

黃鑑編蓋楊億大年之所嘗舉者皆時賢佳句續者  
不知何人亦大年所書唐人句也所錄李義山唐彥  
謙之句為多西崑體蓋出二家

惠崇句圖一卷

僧惠崇所作

孔中丞句圖一卷



中丞者或是孔道輔耶

雜句圖一卷

不知何人所集皆本朝人詩也自魏文帝詩格而下  
二十七家已見吟窓雜錄

吟窓雜錄三十卷

莆田蔡傳撰君謨之孫也取諸家詩格詩評之類集  
成之又為吟譜凡魏晉而下能詩之人皆畧具其本  
末總為此書麻沙嘗有刻本節畧不全

劉貢父詩話一卷

劉攽撰

后山詩話

陳師道撰

潛溪詩眼一卷

范溫元實撰祖禹之子

石林詩話一卷

葉夢得撰

續詩話一卷

無名氏

許彥周詩話一卷

襄邑許顥撰

天厨禁脔三卷

僧惠洪撰

四六談塵一卷

謝伋景思撰

四六話一卷

王銍性之撰

韻語陽秋二十卷

葛立方撰

漁隱叢話六十卷後集四十卷

新安胡仔元任撰

案漁隱叢話係胡仔撰原本作胡存誤今改正

待制舜陟

之子居湖州自號苕溪漁隱

碧溪詩話十卷

莆田黃徹常明撰

續廣本事詩五卷

聶奉先撰雖曰廣孟除之舊其實集詩話耳

山陰詩話一卷

李兼孟達撰

詩家老杜詩評五卷續一卷

莆田方深道集

案宋史藝文志作方道醇集諸家老杜詩評五卷方銓續老杜詩評五卷

選詩句圖一卷

高似孫編

杜詩發揮一卷

金華杜旃仲高撰

觀林詩話一卷

楚東吳聿子書撰未詳何人

宋文獻通攷  
吳聿作張律

文說一卷

南城包揚顯道錄朱侍講論文之語

四六餘話一卷

楊淵撰未詳何人視前二家為汎雜

艇齋詩話一卷

曾季狸表父撰

賓朋宴話三卷

太子中舍致仕貴溪丘昶孟陽撰南唐進士歸朝宰  
數邑著此書十五篇叙唐以來詩賦源流天禧辛酉  
鄧賀為序

西清詩話三卷

題無為子撰

案文獻通  
改為作名

或曰蔡條使其客為之也

宣和間臣寮言其議論專以蘇軾黃庭堅為本奉聖

旨蔡條落職勒停詳見能改齋漫錄

隨齋  
批注


環溪詩話一卷

臨川吳沆撰





直齋書錄解題卷二十二



總校官庶吉士 臣侍朝

校對官庶吉士 臣何思鈞

膳錄監生 臣袁文宿